

Regional News Unit AIR Aizawl
Thursday, September 03, 2026

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Private damdawiin neituten Sorkar-in Kohhran leh phai damdawiin rate ang a pek theih chuan MUHCS zawm an hnial lo tih an sawi.
- Social Welfare Minister Pi Lalrinpuii'n pianphunga Rualbanlote hmasawmna leh hamthatna sawrkarin a ngai pawimawh tih sawiin hma la tur bik Commission din a ni a ti.
- Prime Minister Narendra Modia leh Belgium PM Bart De Wever te chu nizan khan New Delhi-ah inkawmin India leh Belgium inkar thil pawimawh tak tak an sawi dun.
- Bihar-a tuilian chuan zual lam a pan zel a. Ganga, Gandak leh Kosi luite a len hnuah Son lui chim chin a sang chho leh mek.

<><><>

NGHAM

Private damdawiin neituten Sorkar-in rate tha pangngai tak, Kohhran Hospital thenkhat leh Hospital dangte a pek ang emaw, phai lam Hospital-te a pek ang emaw a pek theih chuan MUHCS chu zawm an hnial lo tih an sawi.

Mimal enkawl damdawi in leh kohhran enkawl damdawi in te intelkhawmna Non-Government Hospital Association of Mizoram chuan sawrkarin rate tha pangngai tak phai damdawi in leh kohhran damdawi in thenkhat te a pek ang rate siamsak an nih ve theih chuan MUHCS zawm an hnial lo tih an sawi a, heng Private Hospital 9-te hian tun dinhmun MUHCS zawm lo hospital-a inenkawlte'n emergency tawpkhaw - ICU ngai, zai nghal ngai leh accident-ah chauh bill an thehlut thei chu pawl an tih thu an sawi a. Emergency dang (Heart attack, BP/Zunthlum sang lutuk leh khawsik sang)-ahte MUHCS leh sawrkar hnathawkte'n bill an thehlut thei lo chu mipuiin an tuar phah hle tih an tarlang.

NGHAM chuan Sawrkarin Kohhran damdawi in leh phai damdawi inte hnena rate tha tak a pek ang chi hi a pek ve chuan MUHCS zawm an hnial loh thu an sawi a. Hei hian mipui phai-a inenkawl tur a tih tlem dawn avangin ram sum leh pai dinhmun pawhin a that phah dawn tih an sawi.

Hetianga inremna felfai zawk siam a nih theihhma hi chuan, mipuiin an hlawkpui theihnan phai hospital thenkhat (Woodland leh Silchar Cancer Institute) te ang bera damloten MR Bill an thehlut theihna turin 'Deemed Empanelled' hospital dinhmunah tal an damdawi inte hi dah rih turin Mizoram Sawrkar an ngen baw a ni.

<><><>

WATER SCARCITY

PHE Department chuan Aizawl tlak lam chawmtu Tui pipe chhia a awm avangin mipuite tui renchem turin an chah.

PHE Department chuan tui pipe chhia avangin tui pump a khaihlak thu sawiin mipuite chu tui ren turin an chah a, pipe chhia chu siam thuai anih theih nan hma an la tih sawiin mipuite chu ruahtui khawl ngai pawimawh tur leh tui neih sa ren tura chahin harsatna thleng avangin hriatthiam an dil bawk.

<><><>

SOCIAL WELFARE MINISTER

Social Welfare Minister Pi Lalrinpuii'n pianphunga Rualbanlote tana hamthatna awm thei ang hai chhuah leh an hmasawna tur ngaihtuah chu sawrkarin a ngai pawimawh tih sawiin hma la tur bik Commission din a ni a ti.

Nimin khan Aizawl-a Dawrpui Multipurpose Centre ah Toyota Kirloskar Motor ten CSR kaltlanga hma an lakna thawh khatna hnuiaia Aizawl leh Lunglei District chhunga mit khaw hmuh lama harsatna nei tan a bika siam tiang semchhuah a ni a, hun hmanpuitu Minister Pi Lalrinpuii chuan kohhran, khawtlang leh ram inrelbawlinaah chanhai zawk ten lei rem an rah ve theihna tura remchang siamsak chu mitin mawhphurhna a ni tiin Device dawngtute chu hmasawn zel tura rilru tipaukhauh tur leh an thlen chin atanga hmasawn zel tura duhsakna hlanin Sawrkar chu mi zawng zawng tana ding a ni tih hre reng turin a chah bawk.

<><><>

MAHILA ROZGAR MAAH 2026

Hmeichhia ten hma an sawna tur leh lei rem an rah theihna tura buatsaih Mahila Rozgar Maah 2026 pualin hmasawna tur hrang hrang inhrilhhriatna hun nimin khan Aizawl-a I & PR Auditorium ah hman a ni.

State Hub for Empowerment of Women, Women & Child Development leh Even Cargo tangkawp buatsaih Job Fair –Implementation Programme ah hian Women & Child Development Director Pi Zoramthangi Chhangte chuan hmeichhe hmasawna tur hrang hrang sawiin thawhhona tha a pawimawh thu a sawi a, hmasawn lo zawk ten lei rem an rah theih nan in tanpui tawn a pawimawh thu a sawi bawk.

Nimina hun hmanah hian Prerna Kaushik, Senior People Operations Specialist, Even Cargo chu Resource Person niin, kalkhawm te a zirtir a, MHIP Branch hrang hrang, Single Mom's Foundation, Territorial Women, Women's Ministry, Salvation Army leh Crescent Home atang te in nula leh nu 200 chuang kalkhawmin hun hlawkthlak tak hman a ni.

<><><>

LPG

IOCL-in revised Retail Selling Price a tihchhuah angin, Mizoram chhungah LPG 14.2 KG (Domestic) leh LPG 19 KG (Commercial) rate chu September ni 1 atanga hman tan tura bithliah thar a ni a.

Rate bithliah tharah chuan Mizoram pumpui (Vairengte tih loh) ah chuan LPG Domestic KG 14.2 chu Rs.1094.00, Commercial (packed) KG 19 chu Rs. 3228.50, 19 KG XtraTeJ chu Rs. 3251.00, 10 KG Composite chu Rs.787.50 a ni. Vairengte ah chuan LPG Domestic KG 14.2 chu 1085.00, Commercial (packed) KG 19 chu Rs. 3214.00, 19 KG XtraTeJ chu Rs.3236.50, 10 KG Composite chu Rs.777.00 a ni thung.

Domestic rate tarlan te hi Aizawl Municipal Area leh District Hqrs. ah te 'home delivery' kalpui tawh a nih avangin Rs.70.00 belh zel tur a ni a, Godown-a hralh erawh chuan Rs.33.43 zel paih thung tur a ni a, Home Delivery a kalpui thei nganglo veng, point delivery kalpuinaah chuan Rs.7.53 belh zel tur a ni thung.



LEITLANGPUI MUSIC FESTIVAL 2026

Leitlangpui Music Festival chu kumin November ni 11 atanga ni 13 inkarah neih ani dawn.

Nimin khan Leitlangpui Music Festival (LMF) 2026 Organising Committee chu an Chairman Tourism Minister Pu Lalnghinglova Hmar hovin a pisa ah an thukhawm a, Tourism Department-i'n mawh la bik tura a ruat event management agency (EMA) 'BBY Animals' aiawhten ruahmanna an siam dan report ngaihthlak niin, inbuatsaihna kalpui dan uluk taka sawiho a ni a. Sawrkar Department hrang hrangte mawhphurhna leh hmalak dan turte sawiho a ni bawk.

Tourism Minister Pu Lalnghinglova Hmar chuan Leitlangpui Music Festival wawi 2 anlo buatsaihah hmasawnna tura tam tak a awm tih sawiin hunpui buatsaih turah Department hrang hrang leh organising commiittee thawhhona tha a pawimawh tih sawiin phai lama rock band leh media te hial an tel beisei anih avangin hlut a hlawh hle tih a sawi.



MUALTHUAM N CASE

Tualthattu a puh Denghmingthanga thlahlui ni 31 zanlai a Lunglei Police Custody atanga tlan chhuak chu ni 2 chhung Police te bakah veng thenkhat YMA ten an zawng chung pawhin chanchin lak lai thleng hian man a la ni lo.

Kan Correspondent thudawn danin, hemi zana duty Officer leh Lock up vengtu te pawh thuzawhfiah an ni a, a tul anga hmalak zel a ni a, hetihlai hian Tualthattu a ngaih tlanchhuak man ala nih loh avang hian nunau tam tak an thlabar hle niin kan Correspondent chuan a sawi.



MCON GRADUATION

Health Minister Pi Lalrinpuii'n Nurse hna chu Mizoram chhung mai nilo, India ram hmun dangah leh ram danga an thawh hunah pawh inngaihtlawmna, inzahna, taimakna leh kristian kan ni tih rilru pu chung a thawh a pawimawh tih a sawi.

Mizoram College of Nursing (MCON) Graduation and Lamp Lighting Ceremony vawi - 39na chu nimin khan Mizoram College of Nursing, Falkawn-a neih a hmanpui na ah he thu hi sawiin Minister chuan zirlai graduate thar te chu an hnathawhna hmun tinah mahni mihring pui te zah chung a midangte tana malsawmna ni turin a chah a. Zirlai kal chhuak te chu khawi hmunah pawh thawk se, an hna chu mihringte tana rawngbawlna a ni tih reng hre reng turin a fuih a. Nurse chu damchhunga midangte enkawl nana hun hman a nih angin, an taksa hriselna leh rilru hriselna venghim turin a chah a ni.

MLA Pi Baryl Vanneihsang pawhin thu sawiin, zirlai zir chhuak te chu an thlen chin ah duhtaw mai lo in sang tak thleng turin a chah a. Mipui rawngbawl an nihna inhre rengin, hmangaihna leh inpekna tak tak nen, ringtute nun dan ang taka nung a nurse rawngbawl hna thawk turin zirlai kal chhuakte chu a chah a ni.

Mizoram College of Nursing (MCON) Graduation vawi - 39na hmannah hian zirlai 32 an graduate a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

HEALTH MINISTER

Telangana State sawrkar hmalaknaa Mizoram Directorate of Nursing zirchiang tura lokal mi pathum ten nimin khan Health Minister Pi Lalrinpuii an kawm.

He hunah hian Telangana sawrkar aiawh study team member pathumte hian Health & Family Welfare Minister Pi Lalrinpuii hnenah Mizoram an rawn tlawh chhan leh an sawrkar hmalakna hrang hrangte an sawi a. Directorate of Nursing hi Telangana State-ah pawh din tura hmalak mek a nih avangin, an din theihna tura hmalakna pakhat atan leh zirchianna nei turin Mizoram hi an rawn thlang a ni.

<><><>

PM

Prime Minister Narendra Modia leh Belgium PM Bart De Wever te chu nizan khan New Delhi-ah inkawmin India leh Belgium inkar thil pawimawh tak tak an sawidun. Belgian PM hian nizan khan ni thum cham turin India a lo thleng a. Belgian Defence Minister Theo Francken chuan a rawn tawiawm a. A cham chhungin Confederation of Indian Industry Business event ah a tel dawn baw k a ni.

India leh Belgium te hun rei tak lo thawkdun tawh an ni a. India in zalenna a neih tirh khan Europe ram zingah Belgium hi India nena inlaichinna tha nei hmasa berte zingah a tel a ni.

Tun dinhmunah India leh Belgium sumdawnna hlut zawng hi dollar tluklehdingawn 13 chuang hu a ni.

<><><>

BIHAR

Bihar-a tuilian chuan zual lam a pan zel a. Ganga, Gandak leh Kosi luite a len hnuah Son lui chim chin a sang chho leh mek a. Hei vang hian Bihar North, Central leh South Bihar ah tuilian avangin mipuiin harsatna an tawh mek a ni. Kan Correspondent sawidanin Ganga lui lianin hmun hniam laite a chim avangin Bhagalpur,Khagaria, Samastipur, Patna, Buxar, Bhojpur leh Vaishali district te chu tuiin a chim a. Bhagalpur chu tuilian tuar nasa ber an ni.

<><><>